

Debi na debe atrasa di mas cu 400 mil florin na Monumenten Fonds Aruba

Hues a ordena cu Museo Numismatico mester sali for di casita geel den Weststraat

ORANJESTAD – Pa fin di luna, esta 31 di Juli 2010, Fundacion Juan Mario Odor cu ta actua bou di e number Museo Numismatico, mester bandona e casita di antaño geel situa den Weststraat pega cu e parada di bus.

Ta asina cu Fundacion Monumenten Fonds Aruba, representa pa mr. Wix, a cuminsa un caso sumario contra Fundacion Juan Mario Odor cu ta actua bou di e number Museo Numismatico. Monumenten Fonds Aruba a demanda pa Hues ordena Museo Numismatico pa sali for di e casita di antaño dentro di 5 dia y pa duna Monumenten Fonds e autoridad cu si Museo Numismatico cumpli, cu nan mes lo por haci esaki, eventualmente cu asistencia di Polis.

Ta asina cu di banda di e

Museo Numismatico no a contradeci e demanda pero solamente a pidi pa duna nan tempo te cu medio of fin di Augustus 2010.

EVALUACION DI HUES

Hues den su evaluacion di e caso ta muestra cu mirando e negligencia di parti di Museo Numismatico caminda te cu Maart 2010 e debe atrasa a acumula ten a 464.773,85 florin y ainda falta di e lunanan April te cu Juni 2010 cu ta 5 mil florin pa luna, den un caso mas profundo, Hues lo caba cu e acuerdo di huur entre e partidonan y lo ordena pa sali for di e luga.


Teniendo cuenta cu esaki, Hues ta haya e demanda admisibel cu excepcion pa e periodo cual Fundacion Monumenten Fonds Aruba kier esaki.

Hues a muestra cu durante

tratamento di e caso a sali na cla cu Museo Numismatico ta inventarisando su coleccion di monedanan cual lo tuma mas o menos 2 siman. E inventarisacion aki ta hopi importante ya cu lo bay bende e coleccion aki pa asina genera placa pa paga entre otro e huur atrasa. Museo Numismatico tambe a muestra cu despues di e inventarisacion, lo bay laga balora e coleccion di moneda pero no por bisa cu exactitud, ki tempo esaki lo tuma luga. Teniendo cuenta cu esaki y tambe a base di husto, Hues a fiha te cu 31 di Juli 2010 cu Museo Numismatico tin chens pa sali for di e casita.

SENTENCIA

Hues su decision ta cu e ta ordena Museo Numismatico pa mas tarda 31 di Juli 2010 mester a sali for di e casita geel situa den Weststraat y pa



pone e yabinan na disposicion di Fundacion Monumenten Fonds. Hues a autorisa tambe Fundacion Monumenten Fonds pa eventual cu ayudo di Polis, haci e casita bashi pero teniendo cuenta cu nos leynan. Lamentablemente un museo cu ta nifica hopi, specialmente

pa nos cultura y turismo, awor ta hay'e ta bende tur e coleccion valioso cu e tin pa asina por paga e debe. Ta di spera cu prome cu 31 di Juli 2010, lo por haya un solucion favorable caminda lo evita cu e Museo Numismatico mester sera.